

PARADA DI SAN NICOLAS

A BRILLA DEN LUHO

ORANJESTAD(AAN): Por bisa cu e parada di San Nicolas Diasabra atardi, despues di e nubia scur di casi un ora di awacero, a brilla den luho.

E parada a cuminsa cu un ora y mey di retrazo, pero a desarolla den e fiesta cu a ser spera di dje. No menos cu 7 soundsystem, 11 banda musical, un steelband y un brassband a anima e 18 gruponan cu a participa.

Varios cu a inscribi no a presenta pa e parada aki diasabra.

Un awacero fuerte a laga e miles di hende canto di e ruta papa muha, mientras cu piezanan di e gruponan tambe a ser afecta, principalmente plumanan cu a krimp den otro manera hangua.

Varios pieza a keda daña y tin cu no a wordo presenta mas.

Despues cu solo a sali y a seca e plumanan, tabata un belleza pa mira con e plumanan a habri atrobe.

Na San Nicolas, gruponan cu a brilla pa nan belleza tabata **Aruba prome y despues di Cristobal Colon di Shell, Beverage Fantasy di Coastal, Dream of Masquerade, Hospi- Jollies, Golden Five di Playa Linda, y Celebracion 500 aña America di La Cabana.**

Masha bunita tambe aunke menos den luho cu esnan menciona ariba tabata e grupo di Los laga bay cu tabata den colornan di Esso, simpel pero masha bunita y hopi anima, y e grupo di cigarianan King of Fantasy.

Den comico tabata Paraloco, Benny Kock y su cama di hospital cu e cria na estado y

Crazy Boys cu a destaca, mientras cu Mariniernan manera custumber a bini hopi anima tambe y cu un bunita carosa (barco di pirata) cu nan reina.

Den musica no por keda sin menciona e steelband di hulandesnan di Marinierskazernes cu a haci lo mihor posibel pa anima nan grupo y tabata e unico steelband den parada y no por keda sin menciona tampoco e disciplina di publico den henter e ruta.

San Nicolas Diasabra a experiencia un di e paradanan di mas luhoso di ultimo añanan y e comentarionan tabata hopi riba John Flemming cu a bini San Nicolas cu gran parti di su grupo, locual a ser masha aprecia, mescos cu e grupo di Playa Linda.